



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 855, Datë 14.01.2022

“MBI AUTORIZIMIN E PËRQENDRIMIT TË REALIZUAR NGA PËRFTIMI I
KONTROLLIT NËPËRMJET BLERJES SË 80.27% TË AKSIONEVE TË SHOQËRISË
ALBTELECOM SHA NGA SHOQËRIA 4IG NYILVANOSAN MUKODO
RESZVENYTARSASAG.”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Rezana KONOMI	Anëtar
Znj.	Adriana BERBERI	Anëtar

Në mbledhjen e tij të datës 14.01.2022 shqyrtoi çështjen me:

Objekti: Autorizimi i përqendrimit të realizuar nga përftimi i kontrollit nëpërmjet blerjes së 80.27% të aksioneve të shoqërisë Albtelecom SHA nga shoqëria 4iG Nyilvanosan Mukodo Reszvenytarsasag.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet blerjes së 80.27% të aksioneve të shoqërisë Albtelecom SHA nga shoqëria 4iG Nyilvanosan Mukodo Reszvenytarsasag.

VËREN SE :

Transaksioni dhe procedura

Pranë Autoritetit të Konkurrencës, është depozituar njoftimi mbi përfitim të kontrollit nëpërmjet blerjes së 80.27% të aksioneve të shoqërisë Albtelecom SHA nga shoqëria 4iG Nyilvanosan Mukodo Reszvenytarsasag.

Referuar dokumentit “Marrëveshje shitje dhe blerje aksionesh”, palët në marrëveshje janë:

Pala blerëse: 4iG Nyilvanosan Mukodo Reszvenytarsasag (4iG Nyrt) është një shoqëri aksionare/publike e kufizuar, e themeluar sipas legjislacionit hungarez, me objekt veprimtarie: prodhim kompjutera dhe pajisje periferike, prodhim i makinerive dhe pajisjeve të zyrës (përveç kompjuterëve dhe pajisjeve periferike), montimi i makinerive dhe pajisjeve industriale, organizimi i projektit të ndërtimit të objekteve, përgatitja e sipërfaqes së ndërtimit, shërbimet e tregtisë me shumicë të kompjuterëve, njësisive periferike dhe programeve kompjuterike, tregti me shumicë jo e specializuar, shërbimet e tregtisë me pakicë të kompjuterave, njësisive periferike dhe programeve kompjuterike, etj.

Shoqëria zotërohet nga [.....]

4iG Nyrt nuk ka asnjë aktivitet dhe nuk gjeneron xhiro në Shqipëri.

Pala shitëse: Cetel Telekom Iletisim Sanayi Ve Ticaret Anonim Sirketi (Cetel), është një shoqëri aksionere e themeluar sipas legjislacionit të Turqisë, e cila zotërohet nga Çalik Holding A.S. dhe shoqëria Türk Telekomünikasyon.

Shoqëria Cetel është zotëruese e 80,274% të aksioneve të shoqërisë target, Altelecom SHA.

Garantuesi i Shitësit: Çalik Holding Anonim Sirketi është një shoqëri aksionere e themeluar sipas legjislacionit të Turqisë, me objekt aktiviteti: Menaxhimin e Kompanive dhe Industrisë së Ndërmarrjeve.

Shoqëria garantuese është aksionari i vetëm i shoqërisë Banka Kombëtare Tregtarë SHA dhe është pjesë e marrëveshjes së njoftuar si garantues i Shitësit për kontratat/marrëveshjet e parashikuara në marrëveshjen e shitjes dhe blerjes së aksioneve të shoqërisë Altelecom SHA.

Shoqëria Target: Altelecom SHA, është një shoqëri aksionare e regjistruar sipas legjislacionit shqiptar me objekt aktiviteti: Shërbimet e komunikimeve elektronike, të parashikuara nga legjislacioni në fuqi për komunikimet elektronike në territorin e Republikës së Shqipërisë, si dhe në përputhje me përcaktimet e licensave që jepen për shoqërinë nga Autoriteti i Komunikimeve Elektronike dhe Postare, ku përfshihen por pa u kufizuar, shërbime të tilla si: shërbimi publik i telefonisë tokësore të lëvizshme, transmetimi i të dhënave, etj.

Shoqëria Altelecom SHA zotërohet nga shoqëria Cetel Telekom Iletisim Sanayi Ve Ticaret A.S. me 80,274% të aksioneve; Posta Shqiptare SHA me 2,466% të aksioneve; Ministria e Ekonomisë, Tregtisë dhe Energjitikës me 16.77 % të aksioneve dhe aksionarë të tjerë (persona fizikë) 3,478 % të aksioneve.

Përqendrimi

Ndërmjet shoqërisë Cetel Telekom Iletisim Sanayi Ve Ticaret AS (shitësi), shoqërisë 4iG Nyrt (blerësi) dhe Çalik Holding Anonim Sirketi (Garantuesi i Shitësit), është lidhur “Marrëveshje shitje dhe blerje aksionesh”, datë 08 dhjetor 2021.

Referuar kësaj Marrëveshje, shitësi ka rënë dakord të shesë dhe blerësi ka rënë dakord të blejë Aksionet për Konsideratë dhe në varësi të kushteve të përcaktuara në këtë Marrëveshje.

Blerësi do të marrë përsipër borxhin sipas Kredisë Totale të Aksionareve dhe Garantuesi i Shitësit ka rënë dakord të kontribuojë një pjesë të huasë së aksionarëve në kapitalin e blerësit, në këmbim

të aksioneve të shitjes 4iG, sipas kushteve të përfshira në këtë Marrëveshje, Marrëveshjen e Kontributit dhe në Marrëveshjen e Transferimit të Borxhit.

Në përfundim të transaksionit shoqëria 4iG Nyrt do të zotërojë 80.27% të kapitalit aksionar të shoqërisë target, Albtelecom SHA.

Nëpërmjet kësaj marrëveshje, shoqëria 4iG Nyrt synon të fitojë akses në tregun e komunikimeve elektronike në Shqipëri, në zhvillimin e shërbimeve të pashërbyer B2B, B2C dhe B2G të telekomunikacionit fiks dhe celular, televizionit si dhe të shërbimeve të IT në Shqipëri.

Mbyllja e Marrëveshjes do të kushtëzohet nga plotësimi i kushteve; marrjen e pëlqimit nga BKT për Transaksionin, marrjen e konfirmimit nga Autoriteti i Konkurrencës, AKEP, AMA, marrjen e pëlqimit nga çdo palë kontraktuale për një ndryshim të dispozitës së kontrollit, etj.

Në lidhje me këto detyrime, Autoriteti ka administruar vendimin nr.1, datë 07.01.2022 të Autoritetit të Mediave Audiovizive, nëpërmjet të cilit është vendosur pranimin e kërkesës së shoqërisë Albtelecom SHA mbi ndryshimet në strukturën e pronësisë së saj, për kalimin e aksioneve të Cetel Telekom Iletisim Sanayi Ve Ticaret Anonim Sirketi (aksionar me 80.27 % të aksioneve”, tek aksionari 4IG Nyilvanosan Mukodo Reszvenytarsasag.

Autoriteti i Komunikimeve Elektronike dhe Postare, nëpërmjet vendimin nr. 1, datë 10.01.2022 mbi “Njoftimin zyrtar të sipërmarrësit Albtelecom SHA, për ndryshimin e strukturës aksionare të shoqërisë tregtare”, sqaron se nenet 71 dhe 74 të ligjit nr.9918/2008, i ndryshuar, e lidhin ngushtë detyrimin e çdo sipërmarrësi të pajisur me Autorizim Individual për të kërkuar dhënien e miratimit paraprak nga AKEP, me të drejtën e tyre për të kërkuar transferimin e Autorizimit Individual për përdorimin e frekuencave për qëllime civile nga një sipërmarrës tek një tjetër.

Nga vlerësimi i dokumentacionit të depozituar, konstatohet se Marrëveshja e njoftuar, shkakton një ndryshim të qëndrueshëm të kontrollit të shoqërisë Albtelecom SHA, i parashikuar në nenin 10, të ligjit nr. 9121, datë 28.07.2003 “Për mbrojtjen e konkurrencës”, i ndryshuar. Palët në transaksion plotësojnë kriteret e xhiros së përcaktuar në nenin 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si rrjedhojë ky transaksion është objekt autorizimi nga Komisioni i Konkurrencës

Analiza e Konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i komunikimeve elektronike dhe treg përkatës gjeografik do të konsiderohet territori i Republikës së Shqipërisë.

Tregu i komunikimeve elektronike është një treg, i cili mbikqyret dhe rregullohet nga Autoriteti i Komunikimeve Elektronike dhe Postare (AKEP) në zbatim të ligjit nr. 9918, datë 19.05.2008 “Për komunikimet elektronike në Republikën e Shqipërisë”. Mbështetur në analizat e tregut të komunikimeve elektronike, AKEP ka vlerësuar se në këtë treg përfshihen; - nën tregjet e rrjedhës së sipërme (shumicë) dhe - nën tregjet e pakicës si në shërbimin e telefonisë së lëvizshme ashtu edhe në shërbimin e telefonisë fikse.

Referuar statistikave të AKEP, mbi të ardhurat e realizuara nga komunikimet elektronike për vitin 2020, evidentohet se operatori me peshën më të madhe të të ardhurave në fushën e shërbimeve të komunikimeve elektronike (fikse dhe celulare), është Vodafone Albania me rreth 38% të totalit të të ardhurave; i ndjekur nga One Telecommunications me rreth 24%; Albtelecom me rreth 21% të tregut dhe pjesa tjetër rreth 17% të tyre.

Në shërbimin e terminimit të thirrjeve, rrjedha e sipërme (*upstream*), çdo operator celular apo fiks zotëron 100% të rrjetit të tij individual pasi nuk ka zëvendësues për terminimin e thirrjeve në secilin rrjet individual. Në këtë kontekst, Albtelecom ka 100% pjesë tregu për thirrjet që terminojnë në rrjetin e tij të telefonisë celulare si dhe 100% pjesë tregu për thirrjet që terminojnë në rrjetin e tij fiks.

Transaksioni i propozuar, nuk ngre shqetësim për konkurrencën në lidhje me tregun me shumicë për shërbimet e terminimit të thirrjeve dhe pozicioni i Albtelecom SHA do të mbetet i njëjtë në tregun e terminimit të thirrjeve me shumicë.

Në tregun e shërbimeve me pakicë, është vlerësuar se tregu i telefonisë së lëvizshme dhe tregu i telefonisë fikse janë të pazëvendësueshëm me njëri tjetrin dhe si të tillë dy tregjet, në nivelin e pakicës, janë analizuar të veçuar.

Tregu i telefonisë celulare është një treg me barriera në hyrje për shkak të numrit të kufizuar të certifikatave të përdorimit të brezit të frekuencave dhe në këtë treg operojnë 3 ndërmarrje. Vodafone Albania SHA është ofruesi më i madh i shërbimeve celulare, i ndjekur nga One Communications SHA. Shoqëria Albtelecom SHA renditet e treta duke zotëruar 13-16% pjesë të tregut për të gjithë treguesit e përdoruesve aktivë, pajtimtarë të kartave SIM, thirrje dalëse, SMS, trafik interneti, përdorues aktivë të broadband; 13% të tregut për të ardhurat totale dhe 14% të ardhurat nga shërbimet me pakicë.

Nga analiza e tregut të shërbimit të telefonisë celulare me pakicë dhe vlerësimit të marrëveshjes mes shoqërive 4iG Nyrt dhe Albtelecom SHA, konstatohet se vetëm Albtelecom SHA operon në tregun përkatës të produktit dhe transaksioni i propozuar nuk do të krijojë mbivendosje të pjesëve të tregut mes 4iG Nyrt dhe Albtelecom SHA dhe për rrjedhojë nuk do të këtë krijim apo forcim të pozitës dominuese të shoqërisë Albtelecom SHA në tregun e shërbimit të telefonisë celulare me pakicë.

Sipas të dhënave statistikore të AKEP, rezulton se numri i operatorëve të autorizuar **në tregun e shërbimit të telefonisë fikse**, që kanë raportuar se kanë pasur aktivitet gjatë vitit 2020, është rreth 40 dhe 183 operatorë kanë ofruar shërbimet broadband fiks.

Shoqëria Albtelecom SHA është ofruesi më i madh i këtij shërbimi me rreth 75% të tij, i cili është operatori i vetëm me shtrirje të rrjetit në të gjitha qarqet e vendit, si edhe zotëron një pjesë të konsiderueshme të infrastrukturës kombëtare për ofrimin e shërbimeve nga rrjetet fikse.

Pas përqendrimit, pjesa e tregut e operatorit Albtelecom SHA do të mbetet e njëjtë, duke qenë se shoqëria blerëse 4iG Nyrt nuk operon në këtë treg dhe si rrjedhim nuk do të kemi ndryshim të strukturës së tregut pas transaksionit.

Shërbimi i paketave të integruara, përmban shërbimin e aksesit në internet, telefonisë fikse dhe TV (CaTV ose IPTV) dhe rezulton të jetë segmenti më konkurrues midis operatorëve të rrjeteve fikse. Altelecom SHA ka qenë ofruesi kryesor i këtij shërbimi, ndërkohë që gjatë viteve të fundit është vërejtur ofrimi i shërbimeve të kombinuara të rrjeteve fikse me ato mobile nga operatore të tjerë, duke promovuar paketa që sjellin përfitime në të dy tregjet.

Në përfundim të analizës konstatohet se, nisur nga fakti që shoqëria 4iG Nyrtr nuk operon dhe nuk gjeneron të ardhura në Shqipëri, përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim në pjesën e tregut që zotëron shoqëria Altelecom SHA në tregun përkatës të produktit.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nga përftimi i kontrollit nëpërmjet blerjes së 80.27% të aksioneve të shoqërisë Altelecom SHA nga shoqëria 4iG Nyilvanosan Mukodo Reszvenytarsasag.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS